

INUIT ATAQATIGIIT

Inatsisartuni



UPA 2017/29
Nuuk, 26.04.2017
Kelly Berthelsen

Inatsisartut ataatsimiittarfianni ataatsimiinnerit, siumut aalajangersarneqareersumik annertussusilimmik, radiukkut aallakaatin-neqartarnissaannik KNR-ip pisussaaffilerneqarnissaanik sulisuteqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inuit Ataqatigiit siullermeerinninnermut oqaaseqaataat)

Innuttaasut oqartussaaqataanerat – oqartussaaqatigiinneq – inuiaqatigiittut ingerlaasitsinnit aqutseriaatsitut atussallugu aalajangersimavugut. Tamannalu partiit tamarmik – aamma Inuit Ataqatigiit sulinerminni tunngavippiaraat. Tamatuma malittai suugaluit, pisariuppata pisariunngippataluunniit, atorniarlugit taamaalilluta aalajangersimavugut. Nunatsinni innuttaasut sumiikkaluarunilluunniit oqallinnermut toqqaannartumik malinnaanissamut periarfisaqassapput.

Innuttaasut oqartussaaqataanerat qanorluunniit ittuugaluarpat, sinniisussanik taaseqataasarnikkut, imaluunniit toqqaannarnerusumik isumasiuisarnerit ator-neqaleraluarpata oqartussaaqatigiinnermi pingaarnerpaaq tassa paasisi-masaqarluni isummertarnissaq. Sunaluunniit oqaluuserineqaraluarpat, sinni-isoqarluni toqqaannartumilluunniit isummertarnikkut aalajangeeqataaffigineqaraluarpat, oqaluuserisap sumik imaqarneranik paasisimasaqarnissaq oqartussaaqatigiinnerup tunngavippiaraa.

Tamannalu pillugu inatsisartut oqaluuserisassaannik oqallinnernillu innuttaasunut malinnaatitsinissaq aqquit sulluunniit ator-neqaraluarpata oqartussaaqatigiinnerup (inatsisartoqarnerup) ilagilluinnarpaa. Tassa inatsisartut pisussaaffigaat innuttaasut aqquit suugaluarnerisut atorlugit malinnaatitsinissaq.

Matumanilu siunnersuutigineqartutut KNR-imi radiop aqutigineqarnissaa siunnersuutigineqartoq Inuit Ataqatigiinniit paasillaarsinnaavarput ilaatigummi KNR pillugu inatsimmi siunertat suliassallu pillugit maattumik allassimasoqarmat (issuaavunga): *”Imm. 5. Aallakaatitassiat innuttaasut inuiaqatigiinnut tunngasunik pingaarutilinnik ilisimatinneqarnissaannik oqallinnissaanillu qulak-keerisuussapput.*

(Kapitali sisamaanni § 20-imiittoq).

Inatsisitigut periarfissaasutut taanna isigineqarsinnaagaluq taamaattoq tusagassiorfiit naqisimangilluinnarnissaat Inuit Ataqtigiinniit pingaarteqigatsigu tusagassiisarfimmuut ataasiinarmut pisussaaffiup tunniunneqarnissaanut taarsiullugu periarfissat allat **tikkuarusuppavut**.

Nunani allani oqartussaaqtigiinnermik ingerlatsiviusuni inatsisartoqarfiit tamarlunarmik namminneerlutik maanna internet atorlugu ataatsimiinnerit malinnaaffigineqarnissaanik periarfissiisimalerput, Inatsisartullumi aamma tamanna periarfissaritippaat. Tassa oqartussaaqtigiinneq pisariuppat pisariunngippalluunniit taassuma malitsigisaa – paasisimasaqarluni oqalliseqataasinnaaneq – taamaalilluni qularnaarneqartarpoq. Kisianni nunatsinni kikkut tamarmik internitseqarnissaat piumasarisinnaanagulu periarfissiissutigisimangilarput ilaatigut attaviit pitsaannginnerat pissutigalugu.

Taamaammat radiukku aallakaatitsiviit allat ilaatigut suleqatiserineqarsinnaanerat takusinnaavarput, ataasermi pingaarnarpaammaat, nunatsinni innuttaasut tamarmik naalakkersuinikkut pisunik arajutsisaarneqaratik oqallinnermut malinnaajuarnissaat.

Tamatuma saniatigut aamma Inatsisartut namminneerlutik radiukku aallakaatitsisassanersut aamma immaqa ataatsimiititaliami oqaluuserineqarsinnaagaluarpoq.

Naatsumik oqaatigalugu: Aap, KNR-mut pisussaaffiliiniarutta KNR pillugu inatsimmi paasinninneq aepqqutaalluni periarfissatut isigineqarsinnaavoq. Kisianni, Inatsisartut namminneerlutik kikkut tamarmik paasisimasaqarlutik oqalliseqataanissaannik oqartussaaqtigiinnermi tunngaviit naapertorlugit pisussaaffigisaminnik periarfissat allat atorlugit naammassinninnissaminnut aamma periarfissaqarput piumaneqarpat atorineqarsinnaasunik.

Taama oqaaseqarluta Inuit Ataqtigiinniit ataatsimiititaliami periarfissat pillugit oqallilluartoqarnissaa kaammattuutigalugu aalajangiivigisassatut siunnersuut ataatsimiititaliamut suliassanngortipparput.